


Fia wås

(... i schreibm dua)

Klaus Ebner



Inhoizvazeichnis

De Fråg
Da Aufaung
De BiachIn (Aans)
De Auschtachla
De Schui
De Deitschlehrarin
De BiachIn (Zwaa)
Da Varein
Da Stüüstaund
De BiachIn (Drei)
De Katalanischn
Des Fia-wås
Glossar
Epilog: Mei Weanarisch

De Fråg

Vo gaunz allaa stööt si jeda Schriftstöllä amoi de Fråg, *fia wås* er oda sie iwahaupt schreibm duat. ... In dera Årt håb i des glesn; in Zeidungsartikl wia in dem Powidl, den a poa Dinterln drunta dazuklatschkat haum, und sicha aa in de literaturwissnschåftlichn Åbhaundlungen. Åba is des aa fränk so?

Wäu mir kamat des ehrlich gsågt a Nünzerl ändas vua. Des san ned de Schreiba söba, de wås si des frågn, wäu's irgndwia aus ana innaren Notwendigkeit außa des duan miassatn, des san de ändan, de's dauand lächan, des soziale Umföd, ålle, de wås dena ihre Biacha daun lesn, de Hawara und de Mischpoch, und bevua ma's vagessn, aa de Zeidungsschapsln und de Gstudierdn vau da Uni, de oiwäu wissn woin, wås an eigentlich auschtupfat, dass a zerscht tadellosa Mensch auf amoi a Dintnbrunza wiad.

De Fråg nåchn Fia-wås-ana-fööbat daddat jå gråd nåch ana Rechtfertigung valāngan. Åba fia wås soi ma si rechtfertign? Då kenntat ma jå glaubm, de Schriftstöllä - und es wissts eh, dass i då oiwäu de Weiberln genauso maan wia de Manderln - fälltat'n außa aus da Gsööschåft, san *Autlåås*, san vaauntwurtungslos draamhappat und autritschgat. I maan, a Äuzerl spinnat samma jå meglichaweis eh, wäu wauma ana Berufung nåcheifat, de zwoa vüü Gsturi måcht, åba ka Gerscht eifoat (und vua oim sans nuar a poa, de wås dafo lebm kenna), daun fråg i mi scho, wås des mit an Gschåftl oder iwahaupt mit ana Vanunft z duan håt.

So gsegn håb i mi nia gfrågt, *fia wås* i eigentlich schreibm dua. Des Schreibm ghert zu mir; des is a Ausdruck meina Söö, und i kenntat ma's ohne des genauso ned vuastöön, wia waun i kan Haxn oder kane Klāwen mehr häddat. Åba

kloa, mii haums des jå aa scho gfrågt, und ned nua amoi; und ojwäu håb i de Leit schmähstad und mit soichane Guckascheckn augstiert (ojso deppat), und i håb ned gwusst, wås i eana sågn soi. Vielleicht håb i aa goa ned iwarissn, *wås* de mi då gfrågt haum. Åba waun gmiadlich vüü Wåssa de Donau åwerinnt, daun måcht am des scho a bisl a Kopfzabrechn.

De Fråg ojso, des *Fia-wås*, is scho a wengal gfinklt. Wauma des ernst nimmt und am End sowås wia'r a Auntwurt haum wü, daun soitat ma einespechtln, wia des gwåksn is, wia'r i, am Aufaung und ojs a Gschråpp, pomali zu dem wurn bin, der i heit bin.